

Segun fuente, no tin otro fundacion manera priminti

Cierre di fdec tin personanan afecta y confundi

ORANJESTAD - Despues cu Minister di Turismo, Transporte, Cultura y Sector Primario Otnar Oduber a anuncia cierre y apertura den un bachi nobo, empleadonan di Fundacion Desaroyo Comunitario (fdec) a ricibi carta di retiro sin indicacion di apertura. Asina un fuente fidedigno a informa Bon Dia Aruba.

Segun informe ricibi e motivo cu a cera fdec ta paso, segun sr. Oduber esaki ta un organizacion ilegal. Bon Dia Aruba a purba haya un reaccion for di sr. Oduber pero el a bisa cu dialuna lo tin un conferencia di prensa riba e tema aki.

Ta cera porta despues di 18 aña

17 empleado ta esunnan cu a ricibi nan carta indicando cu ya fdec lo no tin su portanan habri mas. E carta aki e empleadonan di fdec mester a busca na Arbeidszaken ayera. Despues di 18 aña cu fdec a brinda su servicio na nos comunidad, hopi no sa con pa interpreta cu e fundacion ta ilegal.

Den presupuesto 2014 por a mira cu gobierno ta subsidia e fundacion aki 210 mil 200 florin pa subsidio di salario, y 537 mil florin pa gastonan di e fundacion.

Cumplimento legal

Durante e añanan e relacion anual a wordo entrega na minister, documentonan na Algemene Rekenkamer,



copianan ta semper bay pa financien y ta cumpli cu pagonan di impuesto, segun e fuente.

Posibilidad re apertura

Bon Dia Aruba a puntra si por a ricibi informacion cu fdec lo habri bek den un bachi nobo manera sr. Oduber a bisa den un articulo publica den nos matutino dia 9 di mei. El a bisa cu e ta duda cu lo tin un futuro pa fdec pa motivo cu cartanan ya a wordo dirigi na e scolnan y otro instancianan cu ta haci uzo di e servicio cu ta wordo brinda.

Consecuencia cierre

E consecuencia cu lo bini ta mas pa e hendenan cu ta haci uzo di e servicio di fdec cual ta haya e sorpresa cu ya e fundacion lo no ta habri mas, casi 800 persona lo no por ricibi e servicio aki mas, segun e fuente. E consecuencia, naturalmente tambe ta

pa e 17 empleadonan cu tin nan famia, cual awor mester haci cambio den nan bida, teniendo na cuenta cu nan edad cual lo haci'e mas dificil pa nan wordo integra na un otro caminda, a duna di conoce.

Finalisacion di trabou

Nos a puntra e fuente te ki dia empleadonan lo traha na e establecimiento of si ya a para tur trabou. E carta cu nan a ricibi ta indica cu ya fdec ta cera pa publico, pero algun cos mester wordo regla ainda pa e cierre.

Te cu dia 31 di augustus a wordo indica cu lo keda den servicio, pero mester desconta e dianan di vacacion di e empleadonan tambe como cu esaki no ta wordo paga na e empleadonan.

Oportunidad pa mehoracion

Bon Dia Aruba a puntra e fuente si tabata tin palabra-

cionnan haci of reunionan caminda tabata purba yega na un miho maneho den fdec, si acaso algo tabata canando ilegal. El a bisa cu esey no a tuma luga, paso sino lo tabata por a drecha esakinan y habri fdec bek den un bachi nobo manera cu sr. Oduber a bisa durante Cumbre y den medionan na diferente ocasion.

Reaccion Oduber luna di mei

Den medionan di comunicacion a sali algun tempo pasa cu en berdad lo bay cera fdec y cu e empleadonan lo perde nan trabou. Den un entrevista sr. Oduber a bisa cu lo cera fdec pero na mes momento lo lanta un otro fundacion caminda e mesun empleadonan ta bon bini.

Sr. Oduber a bisa tambe cu "mi a tuma nota cu den prensa tin cierto expresionnan cu a wordo haci door di

oposicion y mi ta kere cu den e dianan aki, nos ta mira cada biahha mas di e expresionnan aki ta wordo haci." Expresionnan asina mester wordo corigí na mes momento, segun sr. Oduber.

Informacion cu a sali recientemente ta cu, supuestamente kier retira trahadonan for di fdec. Esaki no ta e caso, siman pasa Sr. Oduber a bisa cu el a reuni cu tanto e directiva di fdec, empleadonan y tambe e docentenan cu tin na fdec. Sr. Oduber, berdad a bisa cu e no ta conecto cu e forma cu e subsidio a wordo uza den e fundacion, anto cu e fondonan no a wordo uza manera ta poni den ley di "subsidie verordering".

Apart di esaki tin algun discrepancia mas cu a constata den fdec, cual a conduci na e decision pa termina e subsidio na fdec desde prome di augustus venidero.

Esaki a wordo informa na tur empleado, docente y tambe na e directiva di fdec.

Gobierno hunto cu e directiva actual ta forma un comision cu mester percura pa un fundacion nobo cual lo ta adapta segun e criterio moderno.

Esaki ta parti di locual a wordo publica na luna di mei despues di speculacion di locual cu lo pasa cu fdec. Bon Dia Aruba lo keda pendiente di e conferencia di prensa cu lo tuma luga dialuna unda cu posiblemente sr. Oduber lo trece aclaracion. □